



Radiotelevision
Svizra Rumantscha

Commentari

“Il Grischun” n'exista betg

Commentari da Gian Ramming, schefredactor RTR

Radio Rumantsch

Gieus olimpics / iniziativa da proporz

03.03.2013

Sche lura: il project gieus olimpics en il Grischun as po sepulir per dal bun, u per in lung mument. Sche gnanc ina campagna da tala dimensiun n'era buna da persvader, lura dat quai be in facit: Gieus olimpics e Grischun, quai na va betg a prà. Da memia regiuns na vesan betg il niz da tals gieus.

Ed ussa? Ussa ston differentas dumondas vegnir respundidas. Per exempel da cusseglier guvernativ Hansjörg Trachsel: È sia lavur politica dals ultims onns propi stada buna? Suenten la resgia da Domat, la taxa turistica chantunala èn ils gieus olimpics gia ses terz project che fa naufragi. Las vuschs ch'al giavischan perquai ina pensiun anticipada na vegnan ussa betg a mancar.

Quai as po vesair uschè. Ma probabel fissan la diagnosa e la terapia memia simplas. Ins ignorass numnadamain la dimensiun chantunala da quels trais projects. Ed ins ignorass era che tals projects n'han nagina schanza en il Grischun. Quai declera era, pertge ch'il segund e magari il pli impurtant project dad oz - l'iniziativa per il proporz - è era ida da l'aua giu. Ina visiun grischuna n'exista betg en noss chantun. Il Cussegl grond vegn anc adina vesì sco lieu per defender interess regiunals e locals, e na sco lieu, nua che las differentas ideas politicas stattan en concorrenza, e quai tenor la popularitad ch'ellas han tar il pievel.

Il facit dad oz ha perquai num: tut resta sco quai ch'igl era. Era en l'avegnir vegn discurrì chantunal ed agì regional. Quai na sto betg esser da principi nausch. Fin ussa ha quel sistem funcziunà bain, u na?